

director técnico das obras, agás nos casos nos que non se determine a necesidade da redacción dun proxecto técnico para as actuacións, nos que a memoria poderá ser realizada pola propiedade.

b) Unha reportaxe de fotografías en cor do ben obxecto da intervención subvencionada e que reflictan a obra realizada.

c) As copias compulsadas das facturas, ou documentos equivalentes, dos industriais subministradores ou dos contratistas das obras, así como a certificación do director das obras do gasto total realizado axustado ao proxecto autorizado, para as obras nas que se determinase a necesidade de redacción dun proxecto técnico. Estes documentos estarán emitidos conforme a normativa aplicable e xuntaránselle, de ser o caso, os xustificantes de ter aboado as cotas, taxas ou impostos correspondentes. Cando o importe das facturas sexa inferior a 1.000 euros, poderase acreditar mediante xustificante do recibo do provedor.

d) Unha declaración complementaria, actualizada, do conxunto de todas as axudas solicitadas, concedidas ou pendentes de resolución, para a mesma finalidade, das distintas entidades públicas e privadas (modelo anexo II).

e) De acordo co artigo 29.4º da Lei de subvencións de Galicia, cando o importe do gasto subvencionable supere a contía de 30.000 euros, o beneficiario deberá de acreditar ter solicitado un mínimo de tres ofertas de diferentes provedores, con carácter previo á contratación do compromiso para a realización da obra.

2. A xustificación para a percepción da axuda deberá presentarse no prazo máximo de 3 meses desde que se notificou a concesión da axuda e, en todo caso, antes do 15 de novembro de 2009.

No caso de que a xustificación fose incorrecta ou incompleta, a consellería de Cultura e Turismo poderá outorgar, nos termos establecidos no artigo 45 do Decreto 11/2009, do 8 de xaneiro, unha ampliación do prazo establecido para a presentación da xustificación, sempre que este prazo permita a verificación do cumprimento dos requisitos fixados nas bases reguladoras dentro do exercicio orzamentario de 2009.

Santiago de Compostela, 2 de decembro de 2009.

Roberto Varela Fariña  
Conselleiro de Cultura e Turismo

*Orde do 2 de decembro de 2009 pola que se modifica o artigo 14 da Orde do 1 de abril de 2009 pola que se publican as bases das subvencións ás entidades sen ánimo de lucro de conservación, protección e promoción do Camiño de Santiago e se procede á súa convocatoria para o ano 2009.*

O 8 de abril de 2009 publicouse no DOG a Orde do 1 de abril de 2009, pola que se publican as bases das subvencións ás entidades sen ánimo de lucro de conservación, protección e promoción do Camiño de Santiago e se procede á súa convocatoria para o ano 2009.

O artigo 14 establece a documentación que deberán presentar os beneficiarios das axudas para que se proceda ao seu pagamento. Tendo en conta que na base reguladora non se considerou a posibilidade de admitir, con carácter excepcional, a acreditación dos pagamentos de contía inferior a 1.000 euros mediante xustificante de recepción do provedor, aspecto regulado no Decreto 11/2009, do 8 de xaneiro, polo que se aproba o regulamento da Lei de subvencións de Galicia, cuxa aplicación estaba prevista na orde, considérase que, coa finalidade de non causar prexuízos aos beneficiarios das axudas, procede modificar o referido artigo 14 da Orde do 1 de abril de 2009, polo que

#### DISPOÑO:

Modificar o artigo 14 da Orde do 1 de abril de 2009, pola que se publican as bases das subvencións ás entidades sen ánimo de lucro de conservación, protección e promoción do Camiño de Santiago e se procede á súa convocatoria para o ano 2009 que queda redactado como segue:

#### Artigo 14º-Xustificación xustificativa do pagamento.

A subvención farase efectiva sempre que na data do 31 de outubro de 2009 se tivese executada na súa totalidade a actividade especificada na solicitude a que se refire o artigo 4, e se tivese entregada completa a documentación que a continuación se relaciona:

a) Informe acreditativo de terse completado o obxecto da subvención xunto coas fotografías, notas de prensa e demais material que dea testemuña suficiente do seu cumprimento.

b) Facturas e demais documentos de valor probatorio equivalente con validez no tráfico xurídico mercantil ou con eficacia administrativa, nos termos establecidos regulamentariamente.

A estes documentos xuntaránselle, de ser o caso, xustificantes de ter aboado as cotas, taxas ou impostos correspondentes.

Cando o importe das facturas sexa inferior a 1.000 euros, poderase acreditar mediante xustificante de recepción do provedor.

c) Certificación bancaria actualizada orixinal e acreditativa de que a conta sinalada corresponde á entidade.

d) Declaración xurada actualizada da entidade de ter ou non recibido axudas para a mesma finalidade de calquera outras administracións ou entes públicos ou privados, nacionais ou internacionais e, se é o caso, contías solicitadas.

Así mesmo, e sen prexuízo do anterior, no momento da xustificación da execución total do proxecto e, en calquera caso, antes do derradeiro pagamento, o beneficiario presentará unha declaración complementaria do conxunto das axudas solicitadas, tanto as aprobadas ou concedidas como as pendentes de resolución, para o mesmo proxecto subvencionado das distintas administracións públicas ou calquera dos seus organismos, entes ou sociedades.

Santiago de Compostela, 2 de decembro de 2009.

P.D. (Orde 2-5-2009)

Antonio Fernández-Campa García Bernardo  
Secretario xeral da Consellería de Cultura e Turismo